

## **EUSKARAZKO TESIEN KOLDO MITXELENA SARIA-REN AURKEZPENA**

Apirilaren 16an, Euskal Herriko Unibertsitateak eta Euskaltzaindiak «Euskarazko Tesien Koldo Mitxelena Saria» aurkeztu zuten. Saria euskarazko ikerketa bultzatzeko eta sustatzeko asmoz sortu dute bi erakundeok eta bi urterik behin deituko da.

Aurkezpenean honako hauek izan ziren: Andres Urrutia, euskaltzainburua; Ludger Mees, EHUKo Euskara errektoreordea; Joseba Lakarra, euskaltzain osoa eta EHUKo irakaslea; Koldo Mitxelenaren familiaren ordezkaria; Juan Ignacio Pérez Iglesias, EHUKo errektorea.

Haiek azaldu bezala, bost jakintza-arlo nagusi sarituko dira: Zientzia esperimentalak; Ikasketa teknikoak; Osasun zientziak; Gizarte zientziak eta Zientzia juridikoak; eta Giza zientziak.

Saria sortu ez ezik, 2008ko deialdia ere egin zuten aipatu bi erakundeok. Sari honen epaimahaia honako hauek osatuko dute: EHUKo Euskara errektoreordea, epaimahaiburua izango denak; Euskaltzaindiaren Iker sailburua, epaimahaibuorde gisa arituko denak; EHUKo Euskara Zerbitzuaren zuzendariak; eta bost jakintza-arloetako bina doktorek. Bestetik, EHUKo errektorea eta euskaltzainburua ohorezko buruak izango dira eta botorik ez dute izango. Azkenik, Euskara Errektoreordetzako teknikariak idazkari lana egingo du eta, ohorezko buruek bezala, botorik ez du izango. Irabazleek oroigarria, diploma eta 2.000 euro jasoko dituzte.